

Á MESA DO PARLAMENTO

O Grupo Parlamentar de **En Marea**, por iniciativa dos seus deputados e deputadas Paula Vázquez Verao, Luís Villares Naveira, Antón Sánchez García, Carmen Santos Queiruga, Magdalena Barahona Martín, Marcos Cal Ogando, Francisco Casal Vidal, Luca Chao Pérez, Ánxeles Cuña Bóveda, Manuel Lago Peñas, Juan José Merlo Lorenzo, Paula Quinteiro Araujo, Davide Rodríguez Estévez e Eva Solla Fernández, ao abeiro do disposto no artigo 160 do Regulamento da Cámara, presenta a seguinte **Proposición non de lei para o seu debate na Comisión 5.^a**

EXPOSICIÓN DE MOTIVOS

A residencia mixta de Campolongo, en Pontevedra, de iniciativa e xestión autonómica, aberta en 1993 como residencia de persoas “válidas”, presenta unha serie de deficiencias derivadas na falta de adaptación das súas instalacións ás necesidades das persoas usuarias, asistidas e válidas.

Dende o ano 2015, o Comité de Empresa da Consellería de Política Social da provincia de Pontevedra advertiu á Xunta sobre as deficiencias nas infraestruturas, mobiliario e falta de persoal na residencia de maiores de Campolongo, sen que foran solucionadas.

O edificio foi inicialmente pensado para persoas “válidas” pero, co tempo, o propio envellecemento das persoas ingresadas levou á necesidade de converter Campolongo nun centro de persoas válidas e asistidas (estas, na cuarta planta), sen que se adecuaran as instalacións. Agora, preténdese que a terceira planta sexa tamén para persoas asistidas, pero sen melloras no centro.



Deste xeito, é necesario dotar ás habitacións de persoas asistidas de tomas de osíxeno e de baleiro, para posibilitar o seu uso para a realización de aspiracións en situacións de urxencia.

Tamén cómpre contar con comedores e salas de estar en todas as plantas, acordes á tipoloxía das persoas internas, e mellorar o acceso á cafetería do centro para as persoas internas, así como rematar as obras do comedor da cuarta planta, que se atopa colapsado, por ter un mobiliario inadecuado.

É tamén preciso unha reformulación global do servizo de ascensores, pois o sistema atópase colapsado, avariándose os ascensores de xeito habitual, pola sobrecarga que padecen, ao contar unha residencia de catro plantas con só dous ascensores. Ademais, o montacargas é polivalente, sendo usado para o servizo diario de comidas, de roupa limpa e sucia, lixo, pedidos e mesmo persoas asistidas en padiola e residentes falecidas.

Tamén é escaso o único baño xeriátrico da cuarta planta, o que provoca atrasos no aseo.

Estas dificultades de mobilidade, unido á falta de material adecuado e á carencia de salas de estar e espazos ao aire libre, provocan que moitas persoas teñan que pasar o día nas habitacións e recibir a alimentación nas propias camas.

Dende o Comité de Empresa da Consellería de Política Social da provincia de Pontevedra reclaman, tamén, a creación dunha enfermería no centro, a modificación e melloras no departamento de cociña e maquinaria adecuada para enfermería, comedor, lavandería e cociña.



Advirte o Comité de Empresa que en canto non se melloren estas cuestións se debe renunciar a converter a terceira planta en dependencias para persoas asistidas.

Asemade, a situación de enorme atraso na valoración e resolución dos expedientes de valoración do grao de discapacidade nos EVO de Pontevedra e Vigo provoca que nas residencias da provincia, como é o caso de Campolongo, non exista unha valoración real da situación en canto a dependencia das persoas internas. Este feito provoca que as rateos de persoal por persoas usuarias sexan inferiores ás necesidades reais. En Campolongo, canto menos, serían necesarias as seguintes prazas: dúas de Enfermería, cinco Auxiliares de Enfermería e unha de cociña.

O volume de traballo e as condicións do centro fan insuficientes os actuais postos de traballo, o que se une ao recorte de dereitos pola suspensión do artigo 19 do Vº Convenio Único para o Persoal Laboral da Xunta de Galicia, relativo a descansos e libranzas, o que aumentou o stress laboral e as situacións de sobreesforzo do persoal.

Esta situación descrita foi achegada como corpo da denuncia presentada polo Comité de Empresa da Consellería de Política Social da provincia de Pontevedra ante a “Dirección General de la Inspección de Trabajo y Seguridad Social” e como texto da queixa presentada polo mesmo órgano colexiado ante a Valeduría do Pobo.

Polo exposto, o Grupo Parlamentar de En Marea presenta a seguinte Proposición non de lei para o seu debate en Comisión.



O Parlamento de Galicia insta á Xunta a:

1. Dotar, con urxencia, as habitacións de persoas asistidas da Residencia de Maiores de Campolongo con tomas de osíxeno e de baleiro.
2. Habilitar na Residencia de Maiores de Campolongo todos os espazos de comedor, sala de estar, terraza e espazos ao aire libre que sexan necesarios para o benestar das persoas usuarias.
3. Reformular por completo o sistema de ascensores da Residencia de Maiores de Campolongo, de xeito que sexan adecuados e suficientes para as persoas usuarias e para o persoal do centro.
4. Reformular por completo o sistema de montacargas, evitando o actual uso polivalente do mesmo.
5. Contratar, canto menos, de xeito urxente, o seguinte persoal para a Residencia do Maior de Pontevedra: dúas/dous enfermeiras/os, cinco auxiliares de enfermería, un/unha cociñeiro/a.

Santiago de Compostela, 2 de abril de 2018.

Asinado dixitalmente por:

Paula Vázquez Verao na data 02/04/2018 11:44:37



Luis Villares Naveira na data 02/04/2018 11:44:43

Antón Sánchez García na data 02/04/2018 11:44:50

Carmen Santos Queiruga na data 02/04/2018 11:45:08

María de los Ángeles Cuña Bóveda na data 02/04/2018 11:45:21

Juan José Merlo Lorenzo na data 02/04/2018 11:45:25

Eva Solla Fernández na data 02/04/2018 11:45:28

Luca Chao Pérez na data 02/04/2018 11:45:31

Paula Quinteiro Araújo na data 02/04/2018 11:45:35

Magdalena Barahona Martín na data 02/04/2018 11:45:38

José Manuel Lago Peñas na data 02/04/2018 11:45:42

Francisco Casal Vidal na data 02/04/2018 11:45:45

David Rodríguez Estévez na data 02/04/2018 11:45:49

Marcos Cal Ogando na data 02/04/2018 11:45:53